

淨土證心集

淨土證心集



序

夫所謂土者。心而已矣。心外無土。土外無心。淨名所謂心淨則土淨也。倘以肉團爲心。緣影爲心。既未證心之所以爲心。又安識土之所以爲土。則夫應觀法界一切惟心。心佛衆生三無差別者。果何所謂也。而迷心作境者。昧然罔覺。一心之趨向。遂成兩土之分歧。有穢淨斯有苦樂。有苦樂斯有生佛。一切之國土。想網之所成也。濁惡衆生。既不能信。復何能證。誰則背塵向覺。起厭生欣。當今之世。而欲求一超生死之

捷徑。脫輪迴之方便。舍此淨土一門。其何從而有之。台宗出蓮法師。深究宗門。廣稽教部。不以宗教爲究竟。而以淨土爲指歸。其亦悟徹根源。契理亦復契機。故發爲詩歌。作爲銘詞。無不闡揚淨土。大放厥辭。二十九章之雜綴。所以辯明淨土也。四十八首之題像。所以宏讚淨土也。唯心之頌百八。所以徧窮淨土也。要約之律二十。所以勸脩淨土也。而且欣厭有銘。警策有偈。無非反復叮囑。欲人之同歸於淨土也。夫菩薩之用心。利他更切於自利。怨淨土之不知所脩也。

爰輯儀式以示之。恐淨土之有外乎禪也。復擬牛頌以通之。法師之於淨土固已深信而證之於其心矣。余與法師交契有年。深知巔末。十八猶負薪。二十始薙染。未嘗學問。而能言之亶亶者。不亦難乎其難哉。因弁數語於簡端。以明法師之專心淨土。絕不以宗教接人。正是善宗者不言宗。善教者不言教也。後之學者。當知無宗之非教。無教之非宗。無宗教之非淨土也。幸勿歧而二之。是爲序。

大清光緒乙亥歲孟春月樂成吳鄭衡書於三一閣

淨土證心集

序

之染香室

四

自序

夫大道自如。萬行之本。本元若二。吾教何歸。倘萬行
同一真。奚自得。分迷悟。由一真具萬行。故此有判升
沉。人心自異。道本常然。一念未生。千途安有。故諸聖
達此道。則生死虛寂。衆生昧此道。則輪迴宛然。以致
大覺尊慈。不能自己。示生垂迹。爲實施權。四辯宣揚。
鑒機宜而與法。一音圓演。指空有以利生。佛應雖殊。
理終無別。觀此萬敷之妙用。總爲一性之相關。詳夫
理事雙融。旨明毫端之上。善惡兩念。果招萬類之中。

塞滿太虛盡無餘。填作法界無不徧。若達一心體用相。即便知萬法大小無生。其實返本歸源。隨緣不變也。是以無量法門之多。任他豎窮橫徧。一乘覺場之大。祇須意會神通。古所謂心包太虛量周沙界者。明矣。天凡聖一體。感應靡差。不礙卷舒。不爭遠近。不隔事理。不妨去來。故知從東至西。十萬億土。無論上中下根。皆可往生見佛。祇緣兩土苦樂有異。淨穢不同。所以彼此欣厭。不可不肫切也。佛祖誠言。六方同讚。吾人果信願持名。未有不親證親到者。論位雖有高

低到彼俱無生死。可謂釋迦一代時教。弥陀六字洪名。旨無不該。機無不被者矣。然一生上聖。尚迷隔羅之光。五濁下凡。焉窮徹底之本。但不忍遺教。乃以露鄙懷。畧展數言。聊申淺見。故迦葉菩薩云。從未登地已還。皆名邪見之人。此之謂也。非假如來之方便。曷到寶所之玄門。奈何衆生機由利鈍不同。如來法乃難易仍爾。所以非仗言說。何以決疑。非引證明。何以起信。述成佛祖之言教。同證自他之偏圓。願法界衆生。報惟心九品。三空頓證。親見十劫之彌陀。無量分

身並圓二嚴之福果。塵劫有盡。心願無窮云爾。

時維

大清光緒元年歲次乙亥孟春之月穀旦東甌釋氏
蓮曉柔氏自序於約西精舍

淨土證心集

目錄

卷上

淨土緣起

一心兩土應宜取捨

簡易不可思議

心土不二智者同往

惟心同異

心佛一致諦觀無外

念佛名爲無上深妙禪

佛祖語異理同

約教釋疑

願門普攝無有棄化

求生拔欲根

持名功不虛棄

求生要學信實

尼真起請示

七期念佛普說

女衆錯會經旨

求生不可勝數

往生公私兩利

稱名復本

作佛釋疑

一信永信

誓願決定

立行堅猛

願此法門遞相度脫

附刻真妄心境圖

金裝佛

花獻佛

燈供佛

正助總申回向佛果

卷中

西方殿對聯

盡大地是彌陀

示學人行腳

仰虎溪聯句

即心即佛

四無量心

西方樂

顧命願

散心念佛

牧牛頌

講法華經展席罷席二律

題舌血畫阿彌陀佛像詩

四弘誓願

八苦

十二時念佛歌

九品往生

卷下

欣厭銘

唯心念佛頌

專持求生

願法界衆生同歸

警習勉行

痛策往生

平時功歸臨終

淨土要約

淨土儀式別刊

戒殺放生詩

隨見生靈三皈便決

淨土證心集目錄終

淨土證心集卷上

傳天台古和卮蓮述

淨土緣起

佛之本懷者何。拔人之苦。與人之樂也。雖云法性平等。無非勸人去其邪。以歸於正也。通論之。則無量法門。門門皆然也。若別論之。於中特開橫超一門。更具拔苦與樂之德。最上殊勝之所不同也。是以如來說法。始自華嚴。終至法華。一代時教。則有三百餘會。而經經無不導歸於極樂。良繇是也。厥後佛法時至。妙

教流行。自西而東。傳於震旦。晉代廬山遠公法師。緣於佛陀跋陀羅尊者。授念佛三昧。與弟慧持僧慧永。朝賢貴士。隱逸清信。乃至闕公則等。一百二十三人。社結東林。刻木銘誓。稱名期生。俱超樂國。闕公則願生而來報。其後同誓友人。夜在東京白馬寺。爲公則追忌轉經。於時林殿皆作金色。聞空中有聲曰。我闕公則也。祈生極樂。今果矣。故來相報。言訖不見。淨土因茲傳傳不已。名播天下。則蓮風愈久愈扇。誠感則應。靈瑞昭彰不一。至清楚天等而往生者。誰測其數。

也設非法門之至圓至頓焉得如是乎。以法門頓故法界藏身。太虛無外。又圓故。無論其根之利鈍。信願不虧。稱名即生。故文殊般若經云。衆生愚鈍。觀不能解。但令念聲相續。自往生佛國。縱報末品。終無退轉。所以往生乃三祇之初步。十號之元階。故知其中多有一生補處者。

一心兩土應宜取捨

聞夫人生有所苦痛者。以未得生法二空。凡有懼者皆然也。究其所由。皆自無始。真不守性。遂成妄所。不

返一真之故也。明此理者。外境自心。本來不二。故大覺聖人。視人猶已。興慈運悲。長時救護矣。衆生昧此理。反將自心言是外境。便打成兩極。由是迷心作境。因境生心。造業不已。古德云。假使百千劫。所作業不亡。因緣會遇時。果報還自受。苦哉。自作自受。何與於人哉。即至厭離心生。欲求出離。縱使大悟如悟達一般。業報時至。約理雖悟。苦痛是虛。言事則其苦狀終難得免。祇與麼難忍。應知亦然。所以悟達且爾。吾人現前。雖疾病未至。豈敢高談闊論。生死即涅槃乎。細

細詳之。甚可懼矣。幸有如來不恪慈悲。無問自說淨土法門。謂若有聞者。應當發願生彼國土。又云彼土何故名爲極樂。其國衆生無有衆苦。但受諸樂。故名極樂。以是觀之。則彼此苦樂盡可見矣。蓋雖自一心。不可不有取捨也。不可不捨苦取樂也。

簡易不可思議

觀經云。是心作佛。是心是佛。良以吾人但具心是佛。未作。故名衆生。如來能證心是佛已作。故號彌陀。所以彌陀證無所證。全證衆生之所具。衆生具無所具。

全具彌陀之所證。是故人念佛即佛也。如臣傳旨即王也。衆生心佛名殊。不思議體一。故般若經云。文殊問佛。云何速得阿耨菩提。佛答。有一行三昧。欲入一行三昧者。應須於空閒處。捨諸亂意。不取相貌。繫念一佛。專稱名字。隨佛方所。端身正向。能於一佛念念相續。即是念中。能見過去未來現在諸佛。晝夜常說智慧辯才。終不斷絕。觀此誰敢輕念佛。乃愚夫愚婦之所爲也。何者。蓋即是念中。便能見於三世一切三寶。所有依報國土尚在其中。更有何物是心外哉。祇

如問答中。速得即是。而四字。直指念佛。是第一則公案。所以十世古今。始終不離於當念。無邊刹海。自他不隔於毫端。蓋謂念佛也。豈可思議哉。故涅槃云。聲聞。天眼爲肉眼。學大乘。在肉眼爲佛眼。故脩念佛法門。如同大海中人乘船。四望一統是水。則不必更尋陸地鑿源矣。蓋祇貴一心求生。便是珍重珍重。

心土不二智者同往

問誌公云。智者知心是佛。愚人樂往西方。奚得是同。答豈不知永明禪師云。古德設有邊辟之言。皆是爲

物遣執。則不可獨依其言。不依其義也。此正破人常見之所着。不達自心之邊底。即一向外求。若達即外是內之旨。則一統坦然。誌公決無此語。然他云。智者知心是佛。以心無外故。天然之然。原無造作。則十方佛土在其中矣。所以心包太虛。量周沙界。地獄尚起妙覺之心。何獨西方彌陀佛國不是心乎。既樂土即是吾心。吾知彼之土。即知自心。吾念彼之佛。即念自心。土即自心之土。心即自土之心。心土不二。生佛一致。毫釐不差也。如是則念佛求生。何愚之有。觀佛三

昧經云。文殊自敘宿因。謂得念佛三昧。當生淨土。世尊復記之曰。汝當往生極樂世界。故文殊發願經偈曰。願我命終時。盡除諸障礙。面見彌陀佛。往生安樂刹。生彼佛國已。滿足我大願。阿彌陀如來。現前授我記。夫文殊大乘中之大智。尚且同往。則馬鳴龍樹。及此天衣懷圓。照本等。不待言矣。何乃知心是佛者。便不求生乎。智者知心是佛。尚要求生。則愚者求生。理應然也。

惟心異同

孟子曰。言近而指遠者。善言也。守約而施博者。善道也。何況如來出世之道。仰之彌高。鑽之彌堅。一切衆生之所不測。蓋大道心體。惟佛獨證。圓明洞徹。毫無滯礙。故三智一心中知。五眼一眼中見。十方三世所有一切諸佛淨土。皆自心之本具。故言惟也。俱舍頌云。四大洲日月。須盧六欲天。梵世各一千。名一小千世。此小千千倍。說名爲中千。此千倍大千。皆同一成壞是也。一大千世界。稱一佛土者。百億日月。百億須彌。百億四大海。百億鐵圍山。名一佛土。廣大若此。則

佛佛國土。例爾可見。從是西過十萬億佛土。乃彌陀佛國。如此觀之。彼土此去甚遠。儼然有寶樹寶池。欄楯羅網。四色蓮花。海會聖衆在。亦非譬喻比量約法等。乃實境之事也。不是他物。又不向外來。皆是吾心廣大。故包如許佛土。然亦不獨吾爾。則諸佛國土。唯蟻心包含亦可。何以故。蓋蟻身雖微。心大亦然。若了此者。決定無疑。毫無所滯。方可名唯心淨土也。如其不然。則一切佛土。皆在心外。說之於口。則同見之於心。則異。而不可名唯心也。蓋論同。則心包太虛。如廬

山永明楚石等輩。見佛求生西方者。言唯心爲之同也。論異。則太虛包心。言淨土便在目前。彌陀不在西方者。彼惟心爲之異也。由之。瑟冥爲於某之門。孔子之言。何謂也。故玄沙云。學道之人。不識真。祇爲從前。認識神。無量劫來生死本。癡人喚作本來人。楞嚴經云。落魔道者。都指現前爲佛國。別無淨居。及金色相好等。觀佛祖語句。如鑑明鏡。則好醜顯然可見。

心佛一致諦觀無外

問心本無相。安有處所耶。答若無處所。安對汝說問。

如何是心。答六字。洪名問。如是則念心非念佛耶。答。心佛一如。問趙州云。念佛一聲。漱口三日。何乃一如乎。答。大抵祖師接物不定。有時恁麼。有時不恁麼。秘藏指南云。僧問趙州。如何是毘盧師法身。州云。阿彌陀佛。阿彌陀佛。有此誠言。趙州何嘗不念佛也。是以妙悟之士。理事雙運。如鳥兩翼。似車兩輪。缺一不可。汝但知此。未曾知彼。便坐漱口一見。當知正念佛時。而當念究其能念之心。徧一切處了。不可得。是名謂之念。而無念。即空觀。觀心念佛也。將此能念之心。念

彼所念之佛號。乃歷歷而分明。是名謂之無念而念。即假觀觀佛念心也。如是則念念了達能念之心。與彼所念之佛。乃非空非有。二邊叵得。即自即他。中道亦亡。即寂而照。自心觀作佛。即照而寂。彼佛顯自心。全心是佛。全佛是心。衆生心佛。一念圓成。如六字三點。縱橫並別。皆不可議。舉一即三。言三即一。所以妙宗圓中。疏鈔十要等書。一一無非宗旨。汝自置之不看。倘細詳之。必然合之。兩美。故料簡云。有禪有淨土。猶如戴角虎。大集經賢護品云。求無上菩提。應修念

佛禪三昧。若人稱念彌陀佛。號曰無上深妙禪。至心想像見佛時。即是不生不滅法。慈旨親傳。可不信哉。

念佛名爲無上深妙禪

禪有淺深之所不同。非是一定。古人云。山不在高。有仙則名。水不在深。有龍則靈。吾言佛門入道之要。法不在奇。理契則妙。故金剛三昧經云。不動不禪。離生禪想。法句經云。若學諸三昧。是動非是禪。心隨境界流。云何名爲定。聞夫今人之禪所好者。無非坐乎偏空。癡定之見。制之於心。使念不起。以爲奇特。若爾一

違此二經妙旨。二便不知念佛法門。乃當念即空。念而無念。極深極妙之禪定也。不亦惜諸。若真妙禪定者。亦非奇巧。不出乎天然之理。故坐禪三昧經云。菩薩坐禪。不念一切。惟念一佛。如清冷海中金須弥山。乃至功德法身。亦如是念。法華經云。又見菩薩安禪合掌。以千萬偈讚諸法王。然若深達此理。復以守愚空坐。而不念佛者。未之有也。

佛祖語異理同

教明如來久已證入。爲利生故。出現於世。故說淨土

法門云。從是西方過十萬億佛土。有世界名曰極樂。其土有佛號阿彌陀。今現在說法。衆生聞此。彼有現佛可依。則道業易成。故信願持名。標心淨土。壇經云。除去十惡。即是十萬。後人不必疑也。當知佛與祖。語雖異而理則同。何也。觀夫唐代張善和。乃極惡之人。以殺牛爲業。至臨終。地獄相現。有一善知識。指示善和。面西專切念佛。未滿十聲。即見佛從西來。與座得生。確有此事。故稱讚淨土經云。十方恆沙諸佛。出廣長舌相。徧覆大千。證明往生。能不信歟。若非語異理。

同。縱去十惡。脩十善行。儻不回顧西方。其福報於天宮。始終難免左級。安比極樂永劫之不退也。大凡六祖語句。但一時被機。如來說法。正當像末。普被。故大集月藏經云。我末法時中。億億衆生起行脩道。未有一得者。惟依淨土可歸。慈父遺囑。須銘肌鏤骨。今當末世。五濁時熾。境強習重。觀淺心浮。欲有所脩。捨淨土其奚從哉。

約教釋疑

問金剛經云。須菩提。若有人言。如來若來若去若坐

若卧。是人不解如来所說義。何以故。如来者。無所從來。亦無所去。故名如来。何堅執往生。反違大旨乎。答是義當辯。蓋教雖同一大乘。不無始終分設。當知彼經乃大乘始教。如来破相顯性。直達元底。空無所有。體本虛寂也。故經云。若以三十二相觀如来者。轉輪聖王。即是如来。淨土法門。謂之不然。乃大乘終教。見佛相好。無非自性。觀經云。無量壽佛。有八萬四千相。一一相。有八萬四千随形好。一一好。中復有八萬四千光明。一一光明。徧照十方世界。念佛衆生。攝取不

捨其光相好。及與化佛。不可具說。然光明相好。既言不可具說。則何止三十二相。及八萬四千。應知如來具無數相也。若得理事融通。相即是性。性相不二。所以永嘉云。幻化空身即法身。即此義也。若初後不分。莫怪滯礙。而始終詳明。疑應自釋。是以約理雖無所從來。亦無所去。乃彼此來去。即事之理。又宛然也。譬如一大城垣之中。東西不濫。來去分明。或東城裏人。一日問鄰居曰。到何處去。對曰。至西城裏去。他一日回來。問汝何處來。又對曰。西城裏來。如是豈東西來。

去亦不分乎。然倘執一向城中兀坐。東西不來不去。猶之定性木人。能成得大事耶。所以天衣懷大祖師云。生則決定生。去則實不去。而生則決定生。如東城裏至西城裏。則橫超宛然也。而去則實不去。雖有橫超之事。實不出城去。言不去也。非東不至西。言不去也。昔日曹山在洞山門下。有一日告假。洞山曰。子向何處去。曹山曰。到無變異處去。洞曰。既無變異。豈有去耶。曹曰。去亦無變異。往生淨土。生則無生。便是這條道理。所以達者。則理事皎然。如反掌耳。掌即背之。

掌。背即掌之背。背掌雖異。同是手也。

願門普攝無有棄化

人說能具大善根者。纔可念佛往生。我等業惡。安得有分乎。釋曰。是義不爾。摩訶衍云。菩薩不離諸佛者。而作是言。我於因地。遇惡知識。毀謗般若。墮於惡道。經無量劫。雖未得出。復於一時。依善知識。教行念佛三昧。其時即能併遣諸障。方能解脫。有斯大益。何乃自慮障深。反負殊勝法門。可不惜乎。所以諸佛菩薩。乘大願船入苦海者。正爲娑婆衆生宿業重故。萬修

萬退。不能久植善根而來。祇信願具足。無論善之與惡。有至心持名。即得生彼。昔日張鍾馗。亦是業重之人。以其殺雞爲業故。忽見一人著緋。驅羣雞來叫云。啄啄。四畔上啄。兩目流血。受大苦痛。有僧爲設佛像。焚香。念南無阿彌陀佛。兼令鍾馗一心專念。忽然香氣滿室。安然往生。然以仗勝緣。無生易證。使得忍後永無退轉。方可次第脩證圓滿菩提。

求生拔欲根本

娑婆利害者。莫過於生死也。而生死利害者。莫過於

愛本也。此愛之所難斷者。皆因乘習所薰。而内外交攻之故也。所以障閉吾人之心目。使向五欲上馳求不息。故於生死之間。全不說着思着。此之利害者。曾有幾人知之。倘遇病痛時。謂病愈。決志修持念佛。其病稍愈。依然恣心放逸。縱橫自由。彼病中苦痛。全全忘却。將脩持念佛。遠遠拋却。仍在生死苦趣中。而不求出離者。此皆愛重之故也。欲斷其由。觀非體空。終難排遣。然衆生身之根本。莫不皆然。無非宿種。愛水潤澤而有之。縱得一心體空。猶是止沸耳。何者。蓋隔

陰即昧也。所以十住斷結經云。有四億衆。自知死此生彼。牽連不斷。欲爲之源。樂生無欲國土。佛言西方此去無數國土。有佛名無量壽。其土清淨。無淫怒癡。蓮花化生。不由父母。汝當生彼。然則穢土是顛倒自然。樂土則無爲自然。類雖懸隔。倘信願行具。便可生此。脫苦法門之殊勝者。真不可思議也哉。

持名功不虛棄

問衆生蒙昧。未曾奉究。而不知理性。雖教終身念佛。倘不往生。非徒勞耶。答非徒勞矣。法華經云。諸所說

法。隨其義趣。皆與實相不相違背。若說俗間經書。治世語言。資生業等。皆順正法。觀此便可知矣。而治世且得生。何況終身無間。反不生彼耶。所以不足疑也。古德云。無禪有淨土。萬脩萬人去。但得見彌陀。無愁不開悟。故知不可執定。參究。隨願往生。經云。佛國無量。專求極樂者。以因勝十念爲因。故以緣勝四十八願。普度衆生。故所以祇要爾肯。何慮不生。一信永信。念佛無秘訣。要在心死也。

求生要學信實

止水止其源。步牛步其跡。大抵念佛不入門者。皆因心思太活動之故也。雖聞圓妙簡易。諒必還有奇巧法門過於此。人自不肯入之。非門閉也。故知見思甚是利害。乃使人疑。前疑未決。後疑復生。決無了期。又疑之與信。勢不兩立。猶之明暗相傾。總而言之。究疑之源。拔其根者。必須要人自學。作一箇愚直漢。始得。祇信一卷阿彌陀經。是佛親口所說。但執持名號。便可往生。其餘百不知。百不曉。使疑當處頓斷。然後方

知淨土諸書。莫不從此發揮。要人持名也。此乃真誠入門之要訣。而信自然興焉。仁王經云。能起一念清淨信者。是人超過百劫千劫無量無邊恆河沙劫。一切苦難。不生惡趣。不久當得無上菩提。是故入道之門。以信爲首。信心生。然後可論脩道入道矣。此乃圓信淨土法門者。正謂依理起信。確實不謬也。依理起信。故古所以有起信論也。依信明心。故古所以有信心銘也。良繇信爲行之體。行是願之用。信行願具。的爲往生之資糧。苦海之寶筏也。法句十三云。舍衛江

東其水深廣五百餘家。剛強欺誑。佛知可度。往至樹下。有來禮者。有問訊者。佛化爲一人。從水上來。水纔至踝。衆人怪問。曾見有人水上行。有何道術。化人答言。我是江南愚直人耳。聞佛在此。樂欲見之。問他人言。水深淺耶。他人答我水。但至踝。信言而過。無別術也。佛言。執信。便度生死之淵。度數里河。何足爲奇。村人聞之。悉從佛化。今淨土亦如是。皆是佛說。如云。汝等皆當信受我語。應當發願。生彼國土等。吾人祇要執信佛言而行之。便能同度苦海。免此沉淪。而登彼

岸也。

尼真超請示

禮而請曰。起信論云。諸佛法有因有緣。因緣具足。乃可成辦。如木中火性。是火正因。若無人知。不假方便。能自燒木。無有是處。衆生亦爾。雖有正因。薰習之力。若不遇諸佛菩薩善知識等。以之爲緣。自能斷煩惱。入涅槃者。無有是處。吾宿何罪。又造何業。今報女體。障礙之甚矣。善知識尚不能親近。漫言佛菩薩也。乞師垂導。示曰。善哉。女身汝厭甚矣。然實可責。障人自

障。自礙礙人。今既已厭。不必太憂慮也。欲求出離者。祇先擇法簡易爲要。將平日所誦的華嚴法華楞嚴金剛地藏等經。且置於帙。轉前工夫單提名號。專切求生。即脫此身。便得逍遙自在。永劫快樂。彼佛因中有願云。設我得佛。十方無量不可思議諸佛世界。其有女人聞我名字。歡喜信樂。發菩提心。厭惡女身。壽終之後。復爲女像者。不取正覺。聞名尚爾。况稱名乎。一生彼國。今佛現在說法。二大士輔化。上善同居。俱以在會。皆知識者也。更有水鳥樹林。咸詮妙嚮。則三

寶甚是具足。永無退緣。必當作佛。如摩訶波闍波提。及六千比丘尼等。後坐道場。皆號一切衆生喜見如來。又耶輸羅陀比丘尼。當於善國中作佛。號具足千萬光相如來。佛壽無量阿僧祇劫。汝亦如是。是身雖女。是心非女。但願往生。如汝所願。一切莊嚴。悉得成就。將來同作菩提比鄰。圓滿一心矣。尼曰。某甲更以禮謝。從今示後。終願不移。

七期念佛普說

夫所謂七者。乃行人入道之期限也。或二七三七。至

七七日等。大集經云。若人專念一方佛。或行或坐。至七七日。現身見佛。即得往生。乃至小本云。七日執持名號。一心不亂。至臨終。佛及聖衆來迎往生。此皆指尅期之驗也。蓋千經萬論。都勸求生者。由娑婆衆生八苦交煎。諸緣逼惱。無一順適。故大悲出此一門。正爲吾人未證無生。大可哀愍。即現前種種小苦。尚不能忍。何論生死乎。但生死二苦。尚有已去未至。不曾知者。况復是後末劫。疾疫饑饉。刀兵三災之苦乎。孔子曰。人無遠慮。必有近憂。然不思則已。思之則畏甚。

矣。故目連所問經云。佛告目連。世間人雖有豪貴富樂自在。悉不得免生老病死。祇由不信佛經。後世爲人。更甚困劇。不能得生千佛國土。是故我說無量壽佛國。易往易取。而人不能脩行往生。反事九十六種邪道。我說是人。名無眼人。名無耳人。所以淨土法門。真乃心境圓顯。彼此同源。振古如斯。於今爲烈。可謂秘藏之津梁也。以樂邦境勝。故六方同讚。蓮花托體。壽命無窮。無生死二苦也。旣以蓮花化生。而無愛念。故寃親無待。無愛別怨。會二苦也。又無寒暑遷改。故

心神順適。無老病二苦也。萬事所願如意而至。彼虛無妙體。稱性受用。無求不得。與五陰熾盛二苦也。何況更有天垂羅網。地佈金沙。七寶欄圍。四色蓮炬。照徹空中。瓊樓翠聳。及見頂上珠樹。矗雲間。飾莊嚴。種種挺峙。此等境界。豈可思議。以持名易生。故不須參習三乘教典等行。單提六字聖號。則萬脩萬去。有如此捷徑。故龍舒居士文云。而人或不知者。可痛惜也。知而猶不行者。更可痛惜也。時有女衆在傍問曰。西方有如此快樂。逍遙自在。我等念佛亦可生否。答曰。

佛世龍女八歲即往南方無垢世界坐寶蓮花成等正覺。所以汝等雖是女人。切不可自欺也。况昔日韋提希。又是女人。其乃淨土啟請之主。彼時有五百侍女。一聞佛說。應時即見極樂世界。阿彌陀佛。及觀世音大勢至。心生歡喜。皆發阿耨多羅三藐三菩提心。願生彼國。世尊悉記。皆當往生。生彼國已。獲得諸佛現前三昧。然女人無別法門。但知一心念佛。便是。故往生集。聖賢錄。諸書所載。往生者多。無他簡易故也。

女衆錯會經旨

女曰。娑婆之苦已可畏矣。况更受女身苦乎。佛經云。欲生阿彌陀佛國者。皆得不退轉於阿耨多羅三藐三菩提。然凡求生淨土者。皆有願回入娑婆。吾則信佛所說。往生不爾。噫。佛經意旨。汝會錯矣。當知梵語阿耨菩提。此云無上正覺。謂一得正覺。永不退轉。邪覺。是名謂之不退轉。非言不回入度生。名不退也。何者。彼無生忍後。而無爲自然。當入娑婆時。其不失於正定。是不退轉。正顯乎此。何況更有種種方便。神力自在。皆不可議。安可同此。凡夫之所著者。比哉。譬如

貧士。入京黜入翰林選官。其後爲治民而來。豈同前此貧苦之時比哉。故往生論云。遊戲地獄門者。生彼國土。得無生忍已。還入生死國。教化地獄救苦衆生。汝若疑心不決。請以此論誠言爲證。始終無錯。

求生不可勝數

詳夫諸淨土書。錄往生者。萬不得一。良以其所表著者。錄以爲憑。使人信之。實有其事也。豈能具載之乎。所以近者往生。尚不能盡知。况遠方乎。夫釋尊一代寶教。乃徧乎娑婆大千。無不到之處。此震旦往生。尚

不能盡知。况大千乎。佛法既致遠播而且廣。即所被之機亦多矣。其有往生者。非凡夫見聞之所能及也。故無量壽佛經云。彌勒菩薩問佛。世尊。於此娑婆世界。有幾許不退菩薩。生彼佛國。佛答此娑婆世界。有六十七億不退菩薩。往生彼國。一一菩薩。已曾供養無數諸佛。次如彌勒者也。諸小行菩薩。及脩習少功德者。不可稱計。皆當往生。壇經云。東方人造罪念佛求生西方。佛說此六十七億等皆不退。按此則知東方人。其實非造罪求生也。彼經又云。西方人造罪求

生何國。小本經云。其佛國土。尚無惡道之名。惡之名。尚不聞。何況造罪。故觀經明。生彼下品。亦發菩提心。此下下品。乃是十惡人。至彼尚發菩提心。則知西方無造罪。不待言矣。然彼國非較惡。世名善。比十方佛刹。愈勝愈嚴。是故佛言。不但我刹。諸菩薩等。往生彼國。他方佛土。亦復如是。其第一佛名曰遠照。彼有百八十億菩薩。皆當往生。其第二佛名曰寶藏。彼有九十億菩薩。皆當往生。其第三佛名曰無量音。彼有二百二十億菩薩。皆當往生。其第四佛名曰甘露味。

彼有二百五十億菩薩皆當往生。其第五佛名曰龍勝。彼有十四億菩薩皆當往生。其第六佛名曰勝力。彼有萬四千菩薩皆當往生。其第七佛名曰師子。彼有五百菩薩皆當往生。其第八佛名曰離垢光。彼有八十億菩薩皆當往生。其第九佛名曰德首。彼有六十億菩薩皆當往生。其第十佛名曰妙德山。彼有六十億菩薩皆當往生。其第十一佛名曰人王。彼有十億菩薩皆當往生。其第十二佛名曰無上華。彼有無數不可稱計諸菩薩衆。皆不退轉。智慧勇猛。已曾供

養無量諸佛。於七日中。即能攝取百千億劫大士所
脩堅固之法。斯等菩薩。皆當往生。其第十三佛名曰
無畏。彼有七百九十億大菩薩衆。諸小菩薩。及比丘
等。不可稱計。皆當往生。不但此十四佛國中諸菩薩
等。當往生也。十方世界無量佛國。其往生者。亦復如
是。甚多無數。我但說十方諸佛名號。及菩薩比丘生
彼國者。晝夜一劫。尚未能盡。我今爲汝畧說之耳。彼
十方俱生。非佛知佛見。孰可知乎。觀此縱使淨土緣
疎之者。亦不可忽。諸須勉力而信。奮迅而念。何則。大

乘諸菩薩尚爾。我敢自負也哉。

往生公私兩利

佛說十方微塵刹土。俱求生者何哉。大抵如京都會試一般。凡春闈至。各省州縣士子。俱往應試。其應試求名。雖言爲己。却因後來理國家大事。他日蒙旨授職。乃各司其事。各選其處。經國化民。所當爲矣。然所當爲者。其意雖在於國。其功仍歸於己。乃至勲名傳於天下後世也。往生者亦爾。雖則求生見佛。原是爲擔荷如來大事因緣。使之不斷也。是以蒙佛授記。乃

各分其身。各補其處。而遞相度脫。同證菩提矣。然雖則遞相度生。同得法利。仍爲己身當來作佛。而得劫國莊嚴也。如是方知。忍後三祇。益物。乃是公私兩利。故法華經云。富樓那。以斯方便。饒益無量百千衆生。又化無量阿僧祇人。令立阿耨多羅三藐三菩提。爲淨佛土故。常作佛事。教化衆生。又云。爾時。千世界微塵等菩薩摩訶薩。從地涌出者。皆於佛前。一心合掌。瞻仰尊顏。而白佛言。世尊。我等於佛滅後。世尊分身所在國土。滅度之處。當廣說此經。所以者何。我等亦

自欲得是真淨大法。受持讀誦。解說書寫。而供養之。故以淨土。勸同袍之士。及一切人。不可不生也。何則。一生淨土。必得分身化度如是。

稱名復本

夫人者道也。心者佛也。何則。道不自道。是人傳道。故言人即道也。華嚴經云。譬如闇中寶。無燈不可見。佛法無人說。雖智不能了。此之謂也。又佛不自佛。是心作佛。故言心即佛也。猶之這塊檀玉。欲以雕琢佛像耳。若無其心。佛則不成。衆生念頭亦爾。夫佛性雖空。

因其心念是佛。故後必作佛。果受其樂。惡性雖空。因其心念是惡。故後必作惡。果受其苦。何也。蓋似隻手然。拈檀則香。拾糞則臭。應以捨穢取淨。止惡從善也。是以當人欲起念時。猶自不檢察看。則此念還是善矣。惡矣。不亦宜慎乎。今各請自驗。從朝至暮。從暮至曉。決無不起念時。倘有念起。將來決無不受身。有受身。決無不受報。有受報。決無不苦樂。若分苦樂。決無不取捨。若取捨心生。決無不肯脩持。若知脩持捷要。決無不信念佛。何以故。蓋佛從念起。不起佛念。即起

雜念。所以苦樂二果。即今起念爲因。故三昧經云。一念受一身。善念生天上人。中身惡念受三惡道身。百念受百身。千念受千身。一日一夜。種生死根。後當受八億五千萬雜類之身。乃至百年之中。種後世身體骨皮毛。徧大千刹土地間。無空處。若一念不生。恬然反本。夫經是佛說。安可不信乎。嗚呼。吾人皆因無始習重。爲毒所中。毒氣深入。則念頭徧徧與三毒貪瞋癡。邊相應。若不深省。焉知自身過患。莊子云。且有犬覺。然後方知其大夢也。合觀佛經。宜信佛所說。早辦。

前程念佛求生。自免沉淪。莫教後悔難追也哉。當知非起惡念而造罪。焉得入三途之獄門。非起善念而持名。焉得登九品之彼岸。以持名故。念念是佛。外無可加矣。梵語阿彌陀。此云無量光。故善導和尚。其念佛一聲。則有一道光明。從其口出。十聲以至百聲。其光明亦爾。問。今現前念佛者。何以不然。答。念佛者。皆有光明。但自不知耳。如貧女懷孕。輪王彼女。自不知昔桐城有二人。結伴爲客。一死。伴葬之。攜貲還其婦。婦疑伴。伴憤甚。往屍處。陳祭哭訴。鬼與伴。問答如生。

前。乃同歸作證。中途遇事。偶一念阿彌陀佛。鬼大喚
何放光怖我。更速轉數念。鬼懼曰。汝一念。胸輒舒五
色光十餘丈。眩我心目。不能復近汝矣。故知凡持佛
名號。光則煥然。夫何疑哉。蓋光能破闇。縱有闇地。妄
念。蒙佛威光。當念即滅。喻如盲人當天。縱有闇見。妄
念。蒙日精光。當處即滅。故智者大師十疑論第八云。
如萬年闇室。日光暫至。而闇頓滅。豈以久來之闇。不
肯滅耶。猶如被毒箭。箭深毒殲。傷肌破骨。一聞滅除
藥鼓。箭出毒除。豈以箭深毒殲。不肯出也。所以明珠

下於濁水。濁水不得不清。佛號投於亂心。亂心不得
不佛。涅槃云。菩薩六念。念佛第一。華嚴十地品云。地
地不離念佛。兜率偈讚品云。以佛爲境界。專念而不
捨。法華經云。若人散亂心。入於塔廟中。一稱南無佛。
皆已成佛道。諸仁者。惟願信之。信之心之念頭。幸此
佛經所說而行之。復還元覺。以作佛也。

作佛釋疑

問。何以知念佛者。必當作佛也。答。吾今問汝。諒可知
矣。昔日有僧明琛。通內外學。能畫蛇。作常山蛇勢。并

作蛇論。生身變爲蛇。又李伯時畫馬。作打鞦馬勢。活現馬身。此二人皆因心念專切故。現形變作畜類。汝信否。曰。此有往事可據。安得不信也。然則念佛作佛。何獨致疑乎。所以昔有新定少康大師。汝豈不知。於烏龍山。建立淨土道場。築壇三級。聚人午夜行道。康升座。令人面西。康先倡阿彌陀佛。次衆人和之。康倡時。衆見一佛從其口出。連倡十聲。則有十佛。若聯珠然。康云。汝見佛否。如見者。決生淨土。其禮佛人數千。亦有竟不得見者。後囑衆人。當於安養起增進心。於

閻浮提生厭離心。又云。汝等此時。能見光明。真我弟子。遂放異光。數道而亡。然此念佛法門。有如是明驗。現前便見佛出。其後作佛者。不言可知矣。何況彼佛。復有本願云。他方佛土。諸菩薩衆。來生我國。究竟必至一生補處。則後必作佛之說。決定無疑也。

一信永信

一信永信者。要行人信得極。淨土決云。念頭所係最急。如水必赴海。火必炎上。刃必傷。毒必殺。無空過者。此念佛人。信亦如是。一聞佛說。極樂在西。依正莊嚴。

永離苦趣。幸有如此佛國。平時間行住坐卧。自應念念不忘。預得習觀純熟。至臨終念頭。必向西去也。

誓願決定

誓願決定者。要行人願得切。如摩訶那伽大力勇士。怒時額必生瘡。瘡若未合。閻浮提無有人與他可敵也。此念佛人。願亦如是。一信往生。便可脫此輪迴。心必立願。願若未滿。閻浮提違順境阻。汝不得也。

立行堅猛

立行堅猛者。要行人行得力。如清辯與無想外道論

議外道化爲石。以證已見。清辯書於石上。外道以念力堅猛。故明日亦有答詞。既有答詞。其從頑石托質也。此念佛人。行亦如是。彼珍池既可托質。願力應以念念堅猛。後必從蓮花化生也。

願此法門遞相度脫

六字洪名。真實不可思議。越於一切法門之上。何則。若禪勝。安有慈受深。南嶽思。宋慈照。真歇了等。皆宗門砥柱。同指淨土。一意西歸。乃至天如復云。汝未悟。使汝悟。往生萬牛莫能挽矣。若教勝。何以梁道珍。唐

懷感。宋宗坦。至靈峯等。亦皆大乘講宗。奚爲置教持名耶。夫世間人。決無自負。捨勝取劣之理。然究竟念佛爲正因。餘行爲助道。倘經教不弘。則佛法斷絕。何得流通於未來。故法華云。爾時釋迦牟尼佛。從法座起。現大神力。以右手摩無量菩薩摩訶薩頂。而作是言。我於無量百千萬億阿僧祇劫。脩習是難得阿耨多羅三藐三菩提法。今以付囑汝等。汝等應當流布此法。廣令增益。問佛囑法華。未囑淨土。何以濫引。答寶王云。法華三昧。卽念佛三昧也。譬如大蟲。又說老

虎。本來無二。汝何疑乎。一尚不可得。不應言囑與未
囑。但明佛意俱可說也。佛云舍利弗。悟由頓悟。功由
積累。若不積功。妄希頓悟。決無是處。所以悟後起脩。
則取捨應然也。然大約佛意。不越乎此。一切善不可
得。應須脩善。一切惡不可得。應須斷惡。故知菩薩依
之。忍後三祇。終日斷惡脩善。邪說反此。彼云。一切善
不可得。何以脩善。一切惡不可得。何以斷惡。所以寶
王云。解目行足。解正即行正。解邪即行邪。魔佛淺深。
俱憑於解。一行既爾。萬行皆然。故知邪正不信。必落

魔外。倘信邪正。大旨該焉。所望者。意在後來高明。而有志之士。應以出廣長舌相。闡揚弥陀不思議之淨土。傳傳勸化。使至未來。一切衆生。先生彼國。然後分身。更相度脫。齊成正覺者。願方滿矣。所以初威音王時。常不輕菩薩以弘通大乘故。後值燃燈佛授記。於此世界作佛。即我釋迦如來也。於法華會上。乃自述成。謂我若宿世不宣弘佛道。則不能疾得阿耨菩提。故又誡羅睺羅云。若欲速成佛果。必須爲人說法。蓋雖言專脩念佛。亦必承師傳也。弘法之功大矣哉。

附刻真妄心境圖

此圖是鄞江妙叶大師所作。余因茲徹證大事之緣。故附刻之。以報師之深恩。蓋余之禪弊。極難透脫。皆因領悟不真。不得受用耳。故菴提遮女經云。若不見生性。雖因調伏。少得安處。其不安之相。常爲對治。若能見生性者。雖在不安之處。而安相常現前。蓋謂此也。和道光丙午秋。薙染丁未春。受具咸豐甲寅冬。永公老法師破本分。丙辰夏。叅國清蓮公老和尚重關。然爾時於心雖安。究未得安。如是二十年来。至同治

乙丑甯波脩舍利殿畢。於時季冬。哉生明。忽承佛法。徧一切處。了不可得。原是自家尋常日用耳。至此方知前非。本分重關。俱未得旨。并錄右頌一則云。
廿年雲水覓師工。今日方知真妄融。有所色空非自外。無邊刹海是渠中。聖凡不隔東西浪。彼此分明感應通。十萬億西安養國了。如指掌近前同。

真妄心境圖



金裝佛

金即事也。佛即理也。蓋二乘乘。但修空三昧。無相無作。解脫門。不見他方佛面。不植相好等行。尚無淨佛國土。况往生乎。故知理無事。則不嚴。猶之佛而必須裝於金。表嚴於事也。而人天乘。雖修種種有相等行。倘不回願淨土。則漏落三界。不離五趣。故知事無理。則不尊。猶之金而必須裝於佛。表回於理也。今脩淨業人不然。供堂潔淨。而佛像端嚴。即理事雙運。當證果之時。福智圓滿。後必作佛。故佛弟子梵語迦葉。此

云飲光。於昔日時。但以少許金鑄佛。故遂感世世身。有金光出現。飲閉乎日月。以是名之。乃至後遇法華。開顯而頓悟佛乘。釋迦以爲授記。大莊嚴劫作佛。世界名光德。佛號光明如來。故造佛裝金。不可思議者。以此。

花獻佛

花即因也。佛即果也。大思惟經云。若不散花獻佛。雖得往生。而依報不具。行人脩淨業時。更以四時香花。供獻於佛。嚴飾道場。不止往生之依報愈嚴。究竟此

之妙因。將來必尅於妙果。故法華經云。若人散亂心。乃至以一華。供養於畫像。漸見無數佛。昔日有一王子。名無所畏。以蓮花奉獻寶藏佛。佛言。汝以花印虛空。今與汝名虛空印。當來成佛。世界名蓮花。佛號蓮花尊如來。所以奉勸世人。應以種種妙花敬佛。惟願同往蓮花托體。回自向他。齊證菩提矣。

燈供佛

燈即理也。佛即心也。蓋佛本常住於世。皆由娑婆衆生業重。而自己心燈不朗。以不曾見者。反言佛已滅。

度。乃理不明之故也。是以大覺如來。知此末世苦惱。故說淨土法門。使吾求生往見彼佛。方知本來佛即自心耳。今以信佛所說。而念佛往生。為正因。燃燈供佛。為助緣。可名因緣具足。正助雙運。其往生作佛。必矣。阿那律尊者。昔為盜首。入寺盜佛額珠。以箭挑佛燈。令光不滅。後遇釋迦佛世。於法華會上授記。當來作佛。號普明如來。阿那律是梵語。此云無滅。然則以燈光之故。其名即云無滅。至於作佛。又號普明。夫為盜挑燈。果報尚不可思議。何況修淨土者。又復至心

燃燈。其果報爲何如乎。

正助總申回向佛果

心源浩瀚。衆生不達。所以滯空溺有。昏迷中道。長流生死而不歸者。故吾兩土慈父。視之愍之。猶如赤子。忍之不已。勞開折攝二門。釋尊指彼是不死之鄉。理事交融。本來一致。然而不但彼此一致而已。細詳之。凡道場嚴飾處。佛前供具。或奉一香。勝報無邊。佛在世時。有長者名栴檀香。昔曾以香泥塗故塔。從是以來九十一劫。身諸毛孔出栴檀香。優鉢華香。從其口

出。或供一幡。功德亦爾。佛在世時。有婆多迦。過去曾作一長幡。懸毘婆尸佛塔上。從是以來九十一劫。常有。大幡覆廕其上。或供一蓋。百緣經云。有一寶蓋。長者。過去曾持一摩尼寶珠。蓋毘婆尸佛舍利塔頭。從是以來九十一劫。常有自然寶蓋覆其頂上。乃至遇佛出家。皆成佛果。或供一草。一葉。一水。一果。一茶。一衣。一食。一幢。一幔。種種等。亦復如是。無非性起功德。盡是圓因。皆可回願佛道。莊嚴淨土。華嚴經云。此華藏世界海中。無間若山若河。乃至樹林塵毛等處。一

一無不皆是稱真如法界。具無邊德。吾人果能信此。然後專切持名願往。雖隔許土之遙。臨終到在刹那。何則。蓋彼慈父門閭倚望。今已久矣。觀此行者。進一退十。道業荒蕪。而敗之者衆。成之者寡。故第十八願云。設我得佛。十方衆生。至心信樂。欲生我國。乃至十念。若不生者。不取正覺。當知此乃父子天性相關。故爾。昔唐太宗爲秦王時。在軍中。使房玄齡入奏事於高祖。高祖笑曰。玄齡爲吾兒奏事。雖隔千里。猶如面談。當知彼亦父子天性相關。故爾。發是言矣。然彼使

奏尚爾。况吾自稱名乎。彼世間父子尚爾。况吾出世間父子乎。良繇如來佛眼遙見。佛耳遙聞。不止了遠。即近尚且自他同體。故能如是也。所以凡有繫念者。道果隨願之所成。

淨土證心集卷上終

淨土證心集卷中

傳天台古和卮蓮述

西方殿對聯

道紹東林。宏開淨土。

心傳西竺。大闡蓮宗。

佛法難思。感應道交。凡即聖。

心源不隔。往來情見。剎如塵。

步步過。惟心淨土。

人人見。自性阿彌。

無去來中。三資糧到。

不生滅處。九蓮花開。

未悟此心。若已生。若今生。若當生。既生總無不悟。欲登彼岸。已發願。今發願。當發願。有願畢竟同登。

九品蓮臺。丈六金容。三聖相。

七重寶樹。百千種樂。一風聲。

衆生誠深信無疑。能執持名號。時從一日乃至七日。諸佛說往生有證。出廣長舌相。徧覆三千以及大千。三教同源。統儒釋道俱堪念佛。

一心歸命。具信願行。盡可往生。

念佛心深。滄海淺。

往生誓重。泰山輕。

五濁衆生。結殊勝因緣。裝造身容。長丈六。

十方諸佛。讚莊嚴國土。誠言舌相。徧三千。

心量無邊。包含十萬億土之遙。彈指即生。實屬難思

難議。

佛光普被。分列上中下品之位。隨功所感。真是大慈

大悲。

十念功成。托妙品以化生。頓超十二因緣外。
三祇願大。悟真空而見佛。徧入三千世界中。

散心念佛并敘

同居濁世。久溺愛河。去聖時遙。障深習厚。所以今
之人。欲望一心不亂。亦甚難矣。全承大悲垂宥。愍
恕。十念可生。况大品經云。散心念佛。乃至畢苦。其
福不盡。增一阿含經云。四事供養一閻浮提一切
衆生。功德無量。若有衆生。善心相續。稱佛名號。如
一聲牛乳。頃所得功德。過上不可思議。無能量者。

乃至法華。散亂稱名。皆成佛道。遺訓如此。孰謂散
心念佛之無益哉。

莫嫌念佛散心多。佛愍衆生沒奈何。果得吾人疑頓
釋。自然時至出娑婆。

念佛非關散亂心。功能曾有幾知音。大家只管念將
去。終得往生不隔陰。

散心念佛莫疑心。祇要求生願力深。平日工夫無間
斷。臨終佛豈不知音。

散心總不礙持名。靜散本來體自平。逆惡臨終信願

切。但教十念亦能生。

盡大地是彌陀并敘

問。若按宗乘。盡大地是禪堂。佛尚不立。今何反此
指示。答。衆生自性不達。所以處處有着。故禪門重
空宗。掃盡一切。凡聖不立。有此破執。方令開顯。然
後全性起脩。全脩歸性。所以觀經云。諸佛如來是
法界身。是知淨土。乃性宗遮表雙詮。即相之性。用
不離體。即性之相。體不離用。若言離體之用。乃人
天常見。若言離用之體。乃偏空獨善。體用不二。方

各大乘一統。故經云。毘盧遮那徧一切處。其佛所
住名常寂光。蓋佛是正報。土是依報。攝依歸正。故
云。盡大地是彌陀。

無位真人出聖胎。山河大地玉蓮開。一雙鼻孔撩天
趣。念念彌陀萬法該。

圓融性相不偏頗。盡世持名莫放他。即佛即心梅子
熟。無來去處出娑婆。

念到純時迥出塵。梅花雪裏見精神。欲知一物先天
地。除却彌陀總不真。

公案重翻大地禪。彌陀佛號徧三千。一心不亂歸元旨。生彼無生理事圓。

果徹因源不易知。因該果海更難思。欲忝法界藏身句。悟得彌陀大總持。

徧界虛空極樂城。干戈殄滅絕魔爭。箇中盡是法王旨。六字洪名定太平。

牧牛頌并敘

禪淨門庭。施設不同。究竟歸源。本無異路。故中峯云。禪者淨土之禪。淨土者禪之淨土。譬如人造樓

房。必有其基。基者樓之基。樓者基之樓。若將以法
合喻。故禪無淨土。非真禪也。雲棲云。悟後不願往
生。敢保老兄未悟在。非真禪也。明矣。淨土者。有真
禪在其中也。大集經云。稱名號曰無上深妙禪。真
禪在其中也。更明矣。是以永明楚石等輩。其意無
不攝禪歸淨。余恐脩淨者。不達此旨。外視乎禪。不
得已將牛頌擬以通之。蓋亦深爲淨土之遮詮耳。

尋牛

這條峻嶺草離離。花落林間潑眼眉。到此已將塵世

隔那邊應把俗情移。重重行樹含殊勝。靄靄餘霞挺
秀姿。覓徧溪山無跡趣。渾然大起一團疑。

見跡

清風吹破碧雲煙。直上高峯絕頂邊。蹊路條條來眼
底。蹄痕隱隱到跟前。相逢似喘松梢月。乍現如窺井
裏天。追向瀉山渠面目。這回依舊不能穿。

見牛

牛兒一見自忘憂。頭角崢嶸像外遊。不響谷中呼不
住。無陰陽處喚無休。真形露地前生遇。寶智輝天出

世留空把鼻繩難下手。凝眸直視更深幽。

得牛

頓徹天然身外身。野狐精魅敢同倫。昂頭顧視和身
轉。穩步遊行脫俗塵。踏却化城三百種。耕來法地十
分春。端端鼻孔深深貫。寶樹陰中好養神。

牧牛

地闊天高任牧童。溪南溪北與溪東。閒歌一曲知空
有。靜看千經泯異同。咸澤風家茅屋古。趙州旨趣茗
花融。括今訓鍊殊消息。徧歷幽林氣象雄。

騎牛

二十餘年住此山。出山胸次始安閒。高拋箬笠隨風舞。好調樵歌逸興頒。花雨飛來猶破袂。雲林歸去少同班。撥開柏子誠瀟灑。穩坐蒲團展笑顏。

忘牛

得手功勳亦是無。忘情絕慮一身孤。悠悠獨坐聞啼鳥。寂寂空懷卷畫圖。自昔已逢真俗趣。而今不顧舊時途。渾融居址誰爲主。畢竟逍遙沒此模。

雙忘

寂滅珍懷起正場。頓融明暗趣非常。安然脫灑誠悠
遠。直下澄凝絕隱藏。玉漏凋殘天地曉。金鎗甯靜國
民康。優游胞契端呼出一味銷鎔覺性忘。

還源

上下交輝透底清。歸帆風正艤舟行。源泉滾滾知何
許。智海深深誰敢評。洞徹天心詮表裏。端司旨趣抑
縱橫。團圓本致難同賞。照氣冲和萬卉生。

入廬

大展家風獨露機。青山却指野雲飛。江河水滿廬城

闊井里春深月色微。坐對綠楊消息好。行看白牯自知歸。獅兒盡數翻觔斗。不出老僧金縷衣。

示學人行脚并敘

既知出家。必須參學一番始得。若不參學。道從何立。若不知道。便徒勞一生。所以玉不琢不成器。人不學不知道。昔日范蜀公送圓悟禪師行脚云。觀水莫觀污池水。污池之水魚鱉卑。登山莫登迤邐山。迤邐之山草木稀。觀水須觀滄溟廣。登山須登泰山上。所得不淺。所見亦高。故吾寄語後來同袍。

之士。莫教半途而廢。若知尋師二字。便非喫飯一
生。此正古人所謂。物有本末。事有終始。知所先後。
則近道矣。自是歸家。復彼元淨。其益更大。

光陰如箭。日如梭。心地未明。要琢磨。師有匠成。親廣
博。道多歧。舛免蹉跎。能消一念。終歸已。不識三身。莫
放他。頓使本來渠。面目盡虛空。界是彌陀。

講法華經展席罷席二律并敘

大道多歧。楊朱潛然。是故佛語之。所以名爲經者。
必要信之。如徑也。路也。以致吾人依經所行。方不

入歧途。必歸實相之家。故法華經藥王品云。佛言
聞是經典。如說脩行。於此命終。即往安樂世界。阿
彌陀佛。大菩薩衆圍繞住處。生蓮花中寶座之上。
可知法華三昧。即念佛三昧。寶王垂言。亦甚明矣。
此教純圓獨妙哉。五時趣向鷲峯來。師資道契傳心
印。龍象機投繞法臺。舉手低頭金口記。會三歸一本
懷開悟。須頓悟功。須積應。托蓮花養聖胎。
獅兒出窟小爭先。定是台宗起後賢。貝葉經傳西土
典。梵音教演上乘禪。證明塔啟身如故。納受龍呈珠

亦圓知見已開生死絕。同歸佛界樂邦天。

仰虎溪聯句并敘

遠祖得三昧後。遂於東林結社。陶淵明。陸脩靜。亦與焉。看古人何等自在。欲詩則詩。欲佛則佛。余因之仰其聯句之趣。更自娛焉。故賦成一律。

統儒釋道本相同。究竟要推長老風。三箇詩翁聯妙句。七言律法演真空。不求於佛通如隔。有感乎心隔亦通。一百廿三人結社。往生都在藕花中。

舌血畫阿彌陀佛像詩并敘錄十四首

造像功德經。明造佛有十一種功德。一者世世眼目清潔。二者生處無惡。三者常生貴家。四者身如紫磨金色。五者豐饒珍玩。六者生賢善家。七者生得爲王。八者作金輪王。九者生梵天壽命一劫。十者不墮惡道。十一者後生還能敬重三寶。得生無量壽國。作大菩薩。畢當成佛。入泥洹道。又云。若人臨終。發言造像如麥麩。能除三世八十億劫生死之罪。按此。但臨終發言造像。功德尚不可思議。况今親自刺舌耶。以銀錢造像。功德尚不可思議。况

今一片血誠耶。是以求生西方。要結彼佛淨緣。最親切者。莫過於此也。余因茲欣仰其事。始於辛未。終於癸酉。所畫聖相。三百六十餘軸。其中隨畫隨題。錄成四十八首。總爲淨土結緣。倘若清信士女。誠欣發心。刺血謹募者。必須先要焚香。望西祝願。早脫苦海。頓超樂土。智論云。作福無願。無所樹立。願爲導師。能有所成。譬如銷金。隨師所作。金無定也。今刺血造佛。亦爾淨土願立。後自得之。或智或愚。同裂身見之固山。此愛念不斷自斷。若緇若素。

共拔生死之原本。彼淨土無生自生。

願離五濁鄉。甘露得親嘗。舌剖無多許。功標第幾行。
全心是血佛。徧體放毫光。夢破西來約。冰魂潔瑞香。
刺血祇緣脫苦因。焚香托筆妙傳神。願求慈父能容
我。早作清涼國裏人。

觀我沉淪大聖哀。應機現入畫中來。舌端血結佛緣
後。永劫相隨分不開。

人自毘盧又自迷。如來遣我指歸西。惟心血寫惟心
佛。四色蓮花九品題。

佛昔三祇行苦時。爲吾背覺合塵兒。粉身碎骨恩難報。且作形儀血寫之。

久滯娑婆受盡患。將刀裂血豈虞艱。真誠發箇西歸願。早脫浮生老死癩。

血即是心作佛身。三無差別悟前因。大家會入蓮花藏。同受彌陀授記人。

隨緣不變裏虛空。不變隨緣尺幅中。示我兜羅綿手上。韻幽花燦血鮮紅。

嫡嫡親親血逼真。宛然花佛往生人。吾今且問諸君

看。還是他身是自身。

滴血應令達本真。吾人同體佛精神。真如未契人殊佛。契悟真如佛亦人。

盡塵沙界佛身充。人不見兮蘊未空。幸得大悲哀愍我。卷來現片血誠中。

我向西方定指南。禪房血佛不須參。但期神謝歸家去。早與彌陀共一龕。

舌尖刺破血鮮新。點染紅幢供佛身。天性相關真父子。生生攜我脫埃塵。

括血心真佛也。真聖凡同體。本來親。大家打起精神看。都是逍遙自在身。

即心即佛。漁父并敘

馬祖單傳亦指寶王三昧。故言即心即佛也。而言即心即佛者。乃即事而真。表明念佛是成佛之本行。其意正欲人人從此起脩。故又云。非心非佛也。此爲心解妄認之者。護過遮非。實非親證自心佛之知見。詳夫佛之知見者。如佛藏經云。見諸法實相。名爲見佛。夫諸法尚爾。決無十劫導師。萬德洪

名非佛者。以此知即心即佛。全被上根。非心非佛。皆因機不利故言耳。若論大旨。尚不得一。此乃即非二語。故是方便施設。究竟至理同歸。非深非淺。非即非非。第後人學道。因不達故。反謂念佛脩心。未至幽玄。偏重泯絕無寄。以爲極則。可悲也夫。

十世古今不變遷。時時父母未生前。奇特特自然。然。洪名六字外無禪。

即佛即心包太虛。遍周沙界盡無餘。聲歷歷意如如。來乘露地白牛車。

達得稱名深妙禪。一千七百葛籐穿。因愈約。果彌圓。
懶能開口更譚元。
凡聖同居極樂天。誰知其實徹偏圓。花供佛。足乘蓮。
十方來去體安然。

四弘誓願漁家傲并敘

華嚴經云。不發大願。魔所攝持。蓋願即心也。心外
無願。願外無心。所以悟者心大故。其所願亦大。迷
者心小故。其所願亦小。故以四弘廣其心。若能知
自心廣大。無外可得。則大願自此立也。以是四弘

之因。皆惟自心之所生。四弘之果。亦惟自心之所滿。然則度生法門。不知則不可。既衆生與煩惱。二俱無量。吾所學法門。亦應無量。故四弘誓願。乃入道之本源也。所以又云。不要三千大千世界。滿中珍寶。惟願樂聞一句。未聞佛法。故有善財南詢。如是爲法心切之行。智論云。若能發一心言。願我當作佛。滅一切衆生苦。雖未斷煩惱。未行難事。以心口重故。勝一切衆生。此其因地願大。故勝一切。還源觀云。真該妄本。行無不脩。妄徹真源。相無不寂。

是故諸大菩薩。三祇行行。其不見生相可得。良繇此也。至於吾人。但忍力未足。祇堪待渠生淨土已。方可速入回此。大作佛事也。

願度

六道衆生皆苦處。悲歡離合增吾怖。奉勸世人應遠慮。君須悟。榮華富貴如霜露。火宅因知難久住。一心念佛西方去。面見彌陀回首顧。猶非暮。時從歷劫。寃親度。

願斷

煩惱炎炎燒我廡。涅槃條路當前阻。百萬障魔齊出
戶。威如虎。利牙張。爪來傷主。何處藏身能脫苦。一
心念佛求慈父。生則無生生淨土。終非侮。大家同作
蓮花侶。

願學

無量法門同願學。如來爲我消諸惡。行不相違終不
錯。禪驚覺。道人忌坐癡空落。淨土唯心離五濁。一
心念佛橫超遠。夢破南柯蟬脫殼。遮那閣。逍遙快樂
乘蓮夢。

願成

佛道圓成無上諾。本來清淨心超卓。三大阿僧祇劫。作同參學。譬如玉像成雕琢。智刃揮開千萬索。一心念佛非纏縛。普化含靈歸正覺。真常樂。涅槃生死空花落。

四無量心前調并敘

淨名經云。具福德故不住無爲。具智慧故不盡有爲。大慈悲故不住無爲。滿本願故不盡有爲。故如來出世。無非爲拔衆生之苦。爲與衆生之樂。欲令

衆生當成佛者。同自己之所證。又云。佛身者。即法身也。從無量功德智慧生。從慈悲喜捨生。從布施持戒忍辱柔和勤行精進禪定解脫三昧多聞智慧。諸波羅密生。乃至從斷一切不善法。集一切善法。生如來身。蓋佛意雖如是。亦要人信入。依法脩證。不然。枉勞如來出世。徒說一番。奚利乎人哉。

大慈

諸佛大慈。常與樂。靈方妙藥。須知覺。能治衆生煩惱。薄如雲幕。普天甘雨。均霑落。道本多歧。難測度。一

心念佛終非錯。使我神棲紅藕萼。休疑諾。免從苦海
身飄泊。

大悲

諸佛大悲常拔苦。欽聞遺訓能仁語。稽首阿彌陀教
主。香緣聚。吾今相勸諸男女。末世祇堪脩淨土。一
心念佛爲儔侶。慈父恩深如海許。蓮花吐。塵塵刹刹
酬師乳。

大喜

佛喜衆生離苦趣。衆生得樂如來譽。導入寂光同所

住。逍遙念般般稱性莊嚴具。吾已曾知真要務。一心念佛相傳付。但願人人深遠慕。光明炬。珊瑚瑪瑙珍珠樹。

大捨

佛捨怨親平等募。已還乃至圓初住。六道依然同照。顧教人懼。莫從生死關頭去。信此如來金口諭。一心念佛登舟渡。何幸殊門今得遇。殷勤訴願吾早踏蓮花路。

八苦前調并敘

蓋窮八苦之由。始自人生。夢殘報盡之際。中陰身不知趣向何道。而昏昏昧昧。攬父母精血。以爲受生之體。因此穢種不美。所以此身不得自由。而被生死牽纏。連環不斷。故法華經云。無明緣行。行緣識。乃至生緣老死。憂悲苦惱。言此則八苦該矣。老子嘗云。吾有大患。爲吾有身。吾若無身。何患之有。然非是無身。便無患也。良繇清虛之體。則患自息。故彌陀佛國。純以蓮花化生。壽命無量。無有諸苦。永劫快樂。自然使無明滅。則行滅。乃至則老死憂

悲苦惱滅。所以若真爲八苦。求脫離者。則西方淨土。豈可頃刻忘耶。

生

自未生前中陰錯。父夫母婦三緣作。愛念不停難把捉。癡繩索牽來獄戶胎間落。菩薩尚然如覆幕。聲聞至此心源濁。安有凡情非受縛。同知覺。西方淨土香蓮托。

老

老矣般般非受用。思來都是增吾慟。自警猶堪相警。

衆浮生夢。誰知寒暑融還凍。不覺閻翁書已送。形神改變難申頌。鶴髮雞皮空抱痛。心蓮種。西方淨土朱顏共。

病

四大不和違我體。病時孰覺須臾起。坐卧勿安何可倚。求諸已。至心念佛當調理。打破髑髏精細視。箇中非但終無爾。并及娑婆猶不是。彌陀子。西方淨土逍遙矣。

死

善惡因花終結果。當人自植當人坐。死者親情隨者
寡。無常鎖天堂地獄分高下。到底冥途爲不可。何
如及早回頭捨。願此蓮船牢把柁。惟心裏。西方淨土
長安妥。

愛別離

愛別應歸無着體。色身是假還堪比。男女梨園家子
弟。空流涕。諸君普勸相迢遞。會必有離良有以。閻
浮世界誰非死。緣不分開須厭此。心欣彼。西方淨土
常歡喜。

怨憎會

宿業含冤。如兩虎。千千萬萬相凌侮。怨者爲憎。翻會聚。真難拒。夫妻兒女雙眉豎。只可從今休歇去。類同蚌鷓。終非許。當信世尊無妄語。慈恩普。西方淨土。消諸苦。

求不得

因植宿根。人所望。求之不得添惆悵。種種因緣非一樣。能知量。無爭無怨。頻親讓。且放心。身体着相。莫堪久住娑婆上。枉費前功。君自諒。早歸向。西方淨土。

都尊尚。

五陰熾盛

內外見思相逼苦。箇中其事難吞吐。四大浮軀焦爛
。慚嗟今古。心猿意馬家無主。止觀能令除網罟。好
將五陰空爲所。然後稱名終不拒。如來許。西方淨土
應知取。

西方樂漁父并敘

求生西方名無生者。境無體性。因自心之所現。故
不從他生。又心無體性。藉境以標形。故不自生。心

雖空寂境。却宛然。見有優劣。功有深淺。故不共生。
威應道交。淨業三昧。方可尅就。故不無因生。以茲
妙達得往生者。自合無生理趣。蓋法欲遠被。厥道
貴在弘通。是以古德著述。無非美譽聖德。方知彼
國莊嚴。更增彌顯。以至遞相勸化。誠哉果不虛棄。
觀佛三昧經云。往昔寶威德上王佛時。有比丘與
九弟子。往詣佛塔。禮已說偈讚歎。後命終。悉生寶
威德上王佛國。大蓮華中化生。恆得見佛。得念佛
三昧。佛爲授記。各於十方面作佛。觀此故知吾人。

或禮一拜。或稱一名。或讚一言。必歸極樂。佛授記亦爾。

六道惟人最好脩。故來相勸作同儔。承佛力。往生遊樂邦。端的勝閻浮。

此土歡娛不久長。西方快樂永無彊。勤念佛。細思量。應離八苦轉還鄉。

靜坐蒲團憶故鄉。逍遙佛國地清涼。無際畔。自中央。八功德水九蓮香。

淨土奇觀眼界寬。於毫端上境千般。金寶蓋。玉欄杆。

風來樹奏樂聲寒。

淨土欲衣逐念來。諸般巧色總奇哉。非假染。又無埃。稱身瓔珞不須裁。

淨土食時定裏餐。現成禪悅故非難。隨意至。稱心歡。色香美味亦多般。

淨土人人相好同。朱顏勝第六天宮。金地上。寶池中。一生補處壽無窮。

十二時念佛歌并敘

求生淨土。如脫敝著珍。此六字洪名。十二時中。無

間斷者。古常有之。先儒所謂道也者。不可須臾離也。可離非道也。以此推之。其道自可見矣。何嘗隔時暫忘也。余故因此作歌以自策。儻有緣者遇之。亦當以此自策也。

子

半夜子。陰盡璣衡陽復始。輪迴宛轉尚依然。但念彌陀從此止。念彌陀。歸元旨。三界橫超終不死。無邊刹海數如塵。第一同居清泰是。

丑

雞鳴丑。刻玉焚香誠盥手。常時一箇道心中。但念彌陀深信有。念彌陀。要長久。念念如珠盤裏走。大家自是脫胞胎。九品蓮花爲父母。

寅

平旦寅。淨土惟心非遠近。能真見者甚分明。但念彌陀神惻隱。念彌陀。消悲憤。懺罪除愆須自謹。何時得作彼方人。妙體清虛空五蘊。

卯

日出卯。色後聲前休亂撓。當今濁惡業根深。但念彌

陀承力拘。念彌陀。如釘齧。念到不忘真善巧。能令心境自精純妙義無邊也。懶覽。

辰

食時辰。煮茗原爲消渴飲。或求不得更堪憐。但念彌陀登九品。念彌陀精細審。即心即土分明甚。佛出廣長舌相宣。殊門祇要吾人稟。

巳

禺時巳。莫被心猿意馬使。本來自具底家珍。但念彌陀無別是。念彌陀妙傳旨。理事融通知所以。箇中原

不隔秋毫。淨穢還須分彼此。

午

日正午。覺體始知無影覩。當前試把主賓分。但念彌陀爲恃怙。念彌陀。須捨取。西方極樂娑婆苦。普願人得往生。是心作佛。將來補。

未

日斜未。快過光陰真可畏。人生七十古來稀。但念彌陀心且慰。念彌陀。平志氣。玩嘗教典始知味。無善心人不得聞。試看何等之尊貴。

申

晡時申。爲造輪迴神費盡。甘心受苦昧良因。但念彌陀須趕緊。念彌陀。求接引。往生速證無生忍。轉入娑婆利有情。遮相度脫常憐愍。

酉

燈明酉。朝夕普爲心願久。衆生迷惑不知歸。但念彌陀親授手。念彌陀。都我友。花開九品同根藕。他日菩提作比鄰。四恩總報齊三有。

戌

時至成罪。福朝朝還自述。莫非福少罪翻多。但念彌陀無別術。念彌陀。消過失。亦要當人心信實。譬如師子筋為絃。一奏餘絃皆斷。卒。佛經云。譬如有人。用師子筋為琴絃。音聲一奏。一切餘絃悉皆斷壞。若人菩提心中。行念佛三昧者。一切煩惱。一切諸障悉皆斷滅。

亥

陰極亥。清淨妙明心自在。任他世俗事遷流。但念彌陀終不改。念彌陀。常主宰。珠如日月無停待。盡未來時與衆生同歸大會蓮池海。

顧命願法駕導引并敘

凡脩淨業者。平日是因。命終是果。因必有果。故臨行時。誠感彌陀。不來中來。來接行者。行者不去中去。去見彌陀。所以云。生則決定生。去則實不去。觀夫不去義。雖生彼國。仍歸華藏。

慈悲父。慈悲父。惟願力交加。臨命花間全體現。深深免我業緣遮。垂導子歸家。

終無錯。終無錯。歸向夕陽斜。泯絕聖凡來去路。神超三十二恆沙。同托妙蓮花。

九品往生。駐雲飛。并敘

前六品俱善易解。且置勿論。後三品或造罪。或毀犯。或逆惡。何以得生。此蓋因善友提攜之力。亦由彼深信故也。華嚴經云。信爲道元功德母。信能必到如來地。信能永滅煩惱本。信能示現一切佛。合之維摩。八法中之第六云。所未聞經。聞之不疑。故下三品皆信善知識。開導得度。是故善知識者。是大因緣。所以化導。令得見佛。發菩提心。此法華明言。足可徵矣。書云。善者是惡人之師。惡者是善人之資。良繇惡承善力。善應愍惡。以是推之。則世間

無一人可以棄化也。故華嚴經云。捨惡性人。遠懈怠者。輕慢亂意。譏嫌惡慧。是為魔業。然細詳其義。似乎不定。各諒自力之虧盈。智度論云。如二人各有親眷。為水所溺。一人情急。直入水救。無方便力。彼此俱沒。一人有方便。取筏乘之。悉皆得脫。是以初心自利。彼緣儻遇。聊將導歸。稱名隨力化往。

上上

上品上生。圓發三心。乘戒精。三聖終時。幸。臺座金剛。應。嚙頃刻。抵長庚。無生頓證。一念功成。諸佛親摩頂。

觀此勸念佛。同登極樂城。

上中

上品中生。善解心深。自不警。一片冰壺淨。不必持方等。嗒。因果信分明。推尊大乘。臺授紫金。合掌飛行。騁。觀此勸念佛。同登極樂城。

上下

上品下生。至信三經律論評。無上心常省。果與因相應。嗒。報盡夢魂清。金蓮質孕。化佛來臨。初地須臾證。觀此勸念佛。同登極樂城。

中上

中品上生。五戒受持。八戒宏。過患全消淨。金色光明
炳。唵演說苦空聲。歡欣遙聽。稽首慈尊。四果隨時領。
觀此勸念佛。同登極樂城。

中中

中品中生。具足威儀德。易成緣。是熏脩勁。眷屬蓮花
秉。唵不染世間情。珍池波靜。預入聖流。半劫無生定。
觀此勸念佛。同登極樂城。

中下

中品下生。孝養仁慈事並行。知識臨終警。廣說西方境。唵六八誓非輕。往生歸命勢至觀音。聞法肩堪並。觀此勸念佛。同登極樂城。

下上

下品上生。汝聽經題十二名。復教持名勝。宿罪根除。到唵化佛。導歸程。八功水定。蓮萼棲神。百法明門竟。觀此勸念佛。同登極樂城。

下中

下品中生。惡者承聞善友聲。仗佛光明盛。衆罪胥消。

屏。啖獄火轉風清。天花齊整。化佛慰人。爲說梵音聲。
觀此勸念佛。同登極樂城。

下下

下品下生。逆惡愚人最苦情。地獄隨形影。稱佛因心
猛。啖億劫罪俱清。金蓮光映。如日輪升。九品都相并。
觀此勸念佛。同登極樂城。

淨土證心集卷中終

淨土證心集卷下

傳天台古和卍蓮述

欣厭銘并敘

心該淨穢。欣厭自興。苦樂既已懸殊。速應捨此生。彼設使不然。則虛生浪死。徒勞其神。却如悟達國師云。自惟我與釋迦如來同爲凡夫。今世尊成道以來。已經爾所塵沙劫數。而我等相與耽染六塵。輪轉生死。永無出期。此實天下可慚可愧。可羞可耻。故知此界行道自力不具。可謂難至難矣。復不

仗他力。甘心受苦。則癡甚矣。吾所以作欣厭之銘也。

五濁煎熬。炎炎火宅。較彼清涼。大相懸隔。曠劫相違。深自痛責。枉受輪迴。酸心無益。生死關津。驚魂落魄。恩愛悲離。淚多雨澤。漸愧晚知。誠可嘆惜。佛祖恢宏。廣長舌白。血滴心憐。和墨訂畫。遞相宣傳。文成山積。祇爲吾人。解疑除惑。惟決橫超。約然法則。放下萬緣。大休大息。一句彌陀。各自努力。四威儀中。心心記憶。遵而行之。逕如絃直。便脫娑婆。同登淨域。快樂逍遙。

自然衣食。但願一生。咬口信極。致理於心。往生事實。仗彼勝緣。易得作佛。佛外無心。心外無物。不同犀角。獨守孤峴。所以圓人。愈遠愈迄。塵刹無邊。大乘觀訖。

唯心念佛頌并敘錄四十偈

唯心念佛者何。緣生無性也。以無性故。則法界歸元。了無一物。以緣生故。則唯心施設。妙有千殊。故知相資相攝。若事若理。俱不可着。然後起脩。脩而無脩。無脩而修。方可圓成。一心正念。大論云。菩薩知一切精進。皆是虛妄。而常成就不退。是名真實。

精進是故彼唯心之佛。了心者方能繫念。彼唯心之士。了心者方知求生。了且如是。未了者不皆當念佛乎。如來不思議境界經云。三世一切諸佛。皆無所有。唯依自心。菩薩若能了知諸佛及一切法。皆唯心量。得隨順忍。或入初地。捨身速生妙喜世界。或生極樂淨佛土中。觀此可謂念佛往生者。是真大乘不可不知也。縱使提宗考本。豈逃彌陀之外哉。若達一念彌陀處。不必更尋別峯相見。起信論云。初信大乘心人。諸佛皆攝生淨土。信之篤矣。

一念彌陀	吾佛心宗	識得是處	莫問別峯
一念彌陀	意旨如何	禪那無外	外無禪那
一念彌陀	雲門一字	禪淨歸元	究竟不二
一念彌陀	忘情絕慮	正恁麼時	彌陀決覷
一念彌陀	覷着即變	見見之時	見非是見
一念彌陀	見縱深入	見猶離見	見不能及
一念彌陀	無古無今	正法眼藏	涅槃妙心
一念彌陀	法界藏身	這片田地	親到始真
一念彌陀	本人看破	大地山河	不離這箇

一念彌陀	國無二主	倘或不然	大蟲咬虎
一念彌陀	前後際卷	三世如來	總在裏選
一念彌陀	冠攝台宗	五時八教	一代包容
一念彌陀	融通理事	彌陀與吾	不二而二
一念彌陀	原非各各	終日自呼	自應自諾
一念彌陀	嫡嫡親親	曠劫父子	不是外人
一念彌陀	西方極樂	彼佛現時	是我心作
一念彌陀	灼然不錯	極樂自心	自心極樂
一念彌陀	似鏡照鏡	無量壽光	本来自性

一念彌陀	自買自賣	極樂文成	娑婆印壞
一念彌陀	往生公據	無來佛來	無去我去
一念彌陀	開導引導	十萬億西	彈指能到
一念彌陀	歸路迢迢	出離三界	直截橫超
一念彌陀	人謂遠求	余曰不爾	圓明性周
一念彌陀	直下分明	衆生心佛	一念圓成
一念彌陀	智愚不同	智求彼國	愚着胸中
一念彌陀	愚亦可作	信有西方	蓮花寄托
一念彌陀	無別判斷	信願行全	必到彼岸

一念彌陀	超出苦輪	百千萬劫	免受酸辛
一念彌陀	淨業同倫	是非莫辯	名利讓人
一念彌陀	今正其時	這條徑路	更莫再疑
一念彌陀	末世脩行	欲離苦趣	只有往生
一念彌陀	珍重一着	當臨行時	切勿退却
一念彌陀	要在心切	但求出離	娑婆頓絕
一念彌陀	要在念切	提起洪名	咬釘嚼鐵
一念彌陀	要在專切	但辨肯心	更無別訣
一念彌陀	要在痛切	身如山崩	投誠泣血

一念彌陀	又在信切	踢倒疑團	七花八裂
一念彌陀	又在願切	決待往生	不緣別節
一念彌陀	又在行切	劫火縱然	心無易轍
一念彌陀	永劫相承	惟願樂土	含識同登

專持求生并敘

問書云。獲鳥者羅之一目。不可以一目爲羅。治國者功在一人。不可以一人爲國。今淨土應爾。奚不衆善同熏。反將獨稱得往乎。答。此問未得其旨。何則。蓋淨土一門。全在信願。信願若具。散持亦往。儻

無信願。萬行扶助。便得生耶。曰。信願者何。曰。信此有生。必有死。生死不出。諸苦難逃。復信彼國一生。不須捨身受身。以至補處。中間常受其樂。復願此濁穢之軀。要決定捨離。更不再受。願彼清虛之體。要決定寄托。終無易願。果得若爾。萬善齊修。亦生况第稱名乎。

學到無心願往生。終身歸命執持名。知吾與彼罪吾者。一概聽之。總不爭。

說來說去說持名。問我箇中決有程。多障衆生念佛

觀。當今最易到長庚。

斷疑生信志心堅。日日如斯不改絃。祇望臨終歸極樂。更無別事可相牽。

予學達摩直指先。方知念佛勝參禪。禪經後有始終苦。淨土一生道果圓。

願法界衆生同歸并敘。

維摩經云。佛言衆生是菩薩淨土。故知菩薩念佛者。原爲衆生不爲己故。終日度生猶爲度己。終日念佛猶爲念己。何以故。菩薩無己。無所不已。達心

佛衆生無差別故。如天普覆。如地普載。捨生即捨已。離佛即離心。心不可離。生不可捨。雲門所謂。函蓋乾坤者。其旨豈越乎此哉。

花間稽首花間佛。願共花間結聖胎。彼國無生終日去。尊容不動應時來。脫離苦海紅塵骨。化作珍池白玉孩。記入娑婆同訂約。十方盡是紫金臺。

警習勉行并敘

吾人之最難鋤去者。習氣是也。雖斷除無術。不可任其習之所成。要當勉其行之不怠。何則。世尊往

昔自登地。纔事古釋迦。其時猶居凡位。大智度論云。佛言我過去世。亦曾作惡人小蟲。因積善故。乃得成佛。以此觀之。十地尚有心色二習。何況其餘。倘當時不勉力行之。安得於今成佛也哉。

習病深藏性已癡。自家策進勉行之。不離不即虛其體。與佛一心知見治。

穢土雖知體是同。須臾失照昧真空。待渠往見彌陀後。方可戲遊地獄中。

五欲牽來落火坑。主人緊護莫循情。看空四大原無

實。不可隨緣負往生。

染緣究竟沒來因。祇是蓮花願要親。同體昇沉凡聖路。念頭乍起自看真。

彼此原來本自空。未分其事却朦朧。西方心與土俱淨。較作娑婆大不同。

悟後須知愛自裁。莫忘生死苦哀哉。心雖虛寂終難忍。必要歸來保聖胎。

痛策往生并敘

自從無始以來。生已復死。死復重生。生生死死。於

今未脫。其故維何。祇繇因循二字。以致枉受輪迴諸苦。所以昔日張祖留。其友人勸他念佛往生。留云。男未婚。女未嫁。親喪未厝。而未幾亡矣。友往弔云。我友名爲張祖留。勸伊念佛說三頭。可怪閻翁無分曉。三頭未了。便來鈎。故知凡修淨業者。莫可太緩也。一錯百錯。

末世時人。敵死生。健兒億億。有誰羸。當知苦海從橫。脫月藏經中載甚明。

奉勸持名。莫待時。求生人自要先知。閻浮世界光陰。

短。只怕將來錯悞遲。

命存呼吸莫寬脩。但看當年張祖留。世事如棋難下局。資糧趕備早歸舟。

淨業因緣果不差。一條歸路夕陽斜。餘門雖是俱堪入。最穩無如念佛嘉。

一息不還隨業流。真誠念佛莫虛頭。如登寶岫空回手。後悔難追祇自憂。

未得歸心莫自安。已脩行願更休寬。稍乘再世塵緣裏。欲望出離難上難。

如救頭然。祇自親饑時喫飯。豈關人。縱六土是唯心淨。安比往生事更真。

平時功歸臨終并敘

已知求生者。心亦不可太急也。總要不即不離而已。祇如法因禪師。三十載冥心淨土。慧亨律師。六十年淨業專求。凡今之人。每多淺見。詳聞其念佛時。未到一年半載。十年八年。淨境既未得純。諸淨土書。猶未細心詳玩焉。知其味。便謂改絃退轉。欲望道念成就。安有日哉。故先儒有言。不可以仁之

難熟。而甘爲他道之有成。蓋謂此也。况乎淨土之要。無間利根鈍根。久學初學。靜之與否。皆驗於臨終。得往以爲真實之期限。餘外欲以尋悟。欲以發慧。俱非緊要。是故吾語與後來同學者。此殊門。既已得入。堅志莫動。

求生無別可商量。總在行人自主張。小技皆從純熟得。莫教大事喪專長。
平生只剩望西歸。決定無疑願不違。彈指能超清夢趣。百千萬萬倍疾如飛。

三昧功成撒手歸。臨行自有佛光圍。思前慮後空勞力。只要吾人斷是非。

理契方知徑路工。死生關隘勝禪功。幾多辯若懸河輩。不及持名愚婦終。

惡則往生張善和。言其善者數彌多。大都莫不皆然也。要在終時一刹那。

得入此門宿善根。已今功就出乾坤。野人願發蓮花供。另答十方授記恩。

惟心淨土幾曾知。貴要終無退轉時。總是今生歸去

好。免從胎獄更迷離。

清脩淨業即真空。一枕夢殘路自通。父子相關親授手。往生依舊妙心中。

淨土要約并敘

聞夫自達摩以來。禪矜自力者衆。而信歸淨土者。曾有幾人哉。嗚呼。雲門三作國王。尚且遂失神通。况餘智乎。蓋失即退轉故。小本云。極樂國土。衆生。生者。皆是阿鞞跋致。以此較之。則禪與淨。孰利。燦然其明白。故料簡云。有禪無淨土。十人九錯路。誠

可嘆惜。當知末世脩行。非依西方淨土。理事橫超。求其不退墮者。終不可得。果能深信於此。則淨土法門之尊貴。自不容延緩遲疑。吾因不愧。分題撰述。更以勸脩。欣厭信願。行觀念專久。警級成二十首要約之語。以質高明。

西

淨土世尊。自指陳愍吾末劫。救迷津。盡將苦海舟中客。同作蓮池會上人。名尚不聞三惡道。花能常雨六時新。衆生生者難思議。多有一生補處身。

方

我信長庚定不差。常思彼國法王家。花間香結心池
果。岸上枝萌道樹芽。望托蓮臺誠獨切。導歸葵子手
頻斜。往生終滿利生願。圓顯身如出岫霞。

淨

徧界真身無去來。珍池借我滌塵埃。淺深水勢随心
欲。紅白花枝逐念開。寶蓋空幪金大士。香雲繚繞玉
嬰孩。珊瑚樹裏瓊樓上。都是同倫養聖胎。

土

西方淨土我惟心。徧佈沙黃地是金。出水枝擎圓葉
上。浮香岸遠藕花深。戒珠頓悟無生忍。鳥語頻聞妙
法音。迢遞相傳諸善友。同將眷屬悉歸臨。

理

逃禪莫教認胸襟。自性彌陀遠訪臨。彼此不離猶不
即。始終非古又非今。圓融覺體常如是。含裏虛空豈
待尋。一統豎窮橫徧處。塵塵刹刹妙明心。

事

法王慈旨不虛傳。實有西方事宛然。曰壽曰年同佛

永欲衣欲食現吾前。斑痕花映欄杆裏。樂響風迴行
樹邊。快樂逍遙終不盡。歸來共坐玉池蓮。

橫

三界橫開一徑蹊。故鄉令我易歸棲。箇中念佛思親
處。花上標名入品題。疾證菩提無後有。早從淨土悟
前迷。慈尊彼岸久相待。撒手即爲倚馬蹏。

超

欲得超生脫死因。娑婆心起厭離親。本來無量壽尊
刹。皆是阿鞞跋致人。萬劫莊嚴春不老。千花錦繡色

長新道行果滿黃金地。就我彼中出世身。

勸

西方捷徑莫蹉跎。放下身心應早過。名利原空猶不捨。死生且到却如何。寬脩歷劫三祇行。誠感臨終一佛陀。無始輪迴憑此脫。方知淨土異娑婆。

脩

一欣一厭兩相攻。彼國迢迢路自通。諸上善人俱會處。衆中勝友滿虛空。紅塵看破渾如戲。白業脩來早出籠。此土祇緣身易失。同歸見佛壽無窮。

欣

樂邦指我勝超倫。永絕輪迴脫苦辛。乘大願船歸故里。盡虛空界現全身。知多妙貌人同玉。無數蓮花品共珍。如此唯心如此境。千經萬論亦循循。

厭

穢邦都說世同倫。受盡煎熬八苦辛。地水火風成幻質。悲歡離合戀浮身。偏爭人我空勞力。護惜瑕疵錯認珍。及早回頭深厭切。癡繩斬斷莫因循。

信

洪名提起志西標。立定脚跟莫動搖。蓮海悲深容我入。葵忱信向欲君超。烏輪遙憶天邊落。金臂難忘夢裏招。土即自心歸去穩。百千萬劫業能消。

願

萬般世事少關情。要在歸元徑路行。念佛心深滄海淺。往生誓重泰山輕。未圓忍力淨當信。已歷僧祇道始成。朝夕焚香稽首願。就途早到故鄉城。

行

生則無生絕點疑。萬牛難挽我西馳。橫超忍土三千

界。旋轉輪珠十二時。念念是心空。及第聲聲彼自性。
阿彌。珍池同到親摩頂。來作分身選佛師。

觀

觀中。大士侍彌陀。凡聖本來體不頗。毫白眉間光寂。
冥風清池畔。境融和。紅翻上下千重錦。綠漲東西一。
統波。三昧圓成依正就。是心作佛豈淆訛。

念

勿論靜神與散神。聲聲喚徹本來真。大方闊步西歸。
路。更莫好奇別問津。心絕狐疑終得到。工無間斷自。

然純。每聞禪者。究竟誰之一字。他自亦不知。憑他稱偏抑初心人。端的念佛者是誰。應答云。憑他稱念誰爲主。只要往生我出塵。

專

專精念佛出塵囂。定數若干莫放饒。名號性空聲歷歷。歸家徑直路迢迢。知多匹馬單刀入。未見三心兩意起。縱使習深休自礙。慈尊可恕往生消。

久

淨土持名最易超。脚跟勿可被人搖。唯專唯注功彌勝。愈久愈堅益更饒。十念悲深曾有約。一生痛切豈

無聊。彼彈指到元同體。故說西方路不遙。

警未火。濁惡境。強。必須再警。始可克終。

上雖已厭。而淨願畢。命爲期。奈坯器。
未登故岸最猗嗟。一失人身路轉遐。從曠劫來今始
悟。自此生去莫還差。堅強淨願非他力。痛策清脩亦
自家。塵世推窮終是險。賦歸極樂玉無瑕。

戒殺放生詩并敘

蓋聞護生者。以戒殺好施爲首。積德者。以放生贖
命居先。觀夫胎卵濕化。蝸飛蠕動之類。無非與我
皆同一體。豈可恃強而凌弱乎。然有血氣者。都是

貪生畏死。以致逢擒則奔。雖身不可逃。命不可救。而觀其齧鯁之狀。聞其冤號之聲。甚可悲矣。所以古人云。見其生不忍見其死。聞其聲不忍食其肉。告誡諄諄。昭人耳目。奉勸世人。戒殺放生。轉而持齋念佛。現世必登仁壽之途。他生同入蓮花之國。則吾之願庶幾慰矣。

仁風到我話偏遲。考古驗今君已知。莫道放生無報應。臨刑不負壽禪師。

流水遺風萬古垂。泉資象運活魚兒。濟饑說法納佳

種。試看天人授記時。

爲民感格不虛探。信老易牲禱雨甘。梁武慈風猶未
泯。權司天道播東南。

鱗甲羽毛不可誣。蠢形雖異性無殊。古今餘報知多
少。非但隋侯獲寶珠。

羅列厨羹莫妄烹。須知生命識仁情。潘公去後江湖
亂。水族哀號不得平。

本欲逃生何所依。猿垂悲淚夢魂飛。我今苦勸諸君
子。當學商王解網圍。

濟生一片好心存。可易碑名選首元。尤恠封侯龜印
紐。推來皆是藉仁恩。

毛寶當年戰敗兵。拯龜益壽亦分明。蟹知報婢垂危
日。解脫原來仗放生。

當年非但小沙彌。猶有元村老屈師。壽盡還將增甲
子。仁功效勝服靈芝。

誠順好生上帝心。聖言未許動刀砮。慈勳久積龍天
喜。壽自綿長福自臨。

兵鞘深藏我所思。原從天下有仁慈。山林願化文王

圃一統清平樂盛時。

天界懸迎不妄陳。并懷濟鵠佛前身。斷弓猶憶登仙品。三教終成一體仁。

隨見生靈三歸便決

夫戒殺放生。以是濟世身命。今有出世方便。復可奉行。吾人凡隨處見一切生靈。必須要發菩提心。起慈悲念。愍其聖法無知。代他歸依懺悔發願。即稱云。

歸依佛

歸依佛兩足尊

歸依佛竟

歸依法

歸依法離欲尊

歸依法竟

歸依僧

歸依僧衆中尊

歸依僧竟

<p>含靈齊成佛道。</p>	<p>衆生往生西方極樂世界。得覲彌陀。然後分身廣度</p>	<p>弟子某甲代爲衆生。歸依懺悔發願。以此功德普願</p>	<p>自性法門誓願學</p>	<p>自性衆生誓願度</p>	<p>法門無量誓願學</p>	<p>衆生無邊誓願度</p>	<p>從身語意之所生</p>	<p>往昔所造諸惡業</p>
			<p>自性佛道誓願成</p>	<p>自性煩惱誓願斷</p>	<p>佛道無上誓願成</p>	<p>煩惱無盡誓願斷</p>	<p>今代衆生求懺悔</p>	<p>皆由無始貪瞋癡</p>

承斯法利。續他慧命。可謂永作道種。而法門雖言
 方便。其所結法緣。甚易廣大。四恩總報。三有齊資。
 法界衆生。同圓種智。

淨土證心集卷下終

助印《淨土證心集》功德芳名錄：

拾肆萬參仟：顏壽山

壹萬貳仟元：鐘蘇銀來（亡者）

肆仟柒佰元：釋觀慧

肆仟元：釋善定

參仟元：謝逢春

貳仟伍佰元：釋璨慧 釋演融 釋德融

貳仟肆佰元：釋受定

貳仟參佰陸拾元：呂楊極（亡者）

貳仟參佰貳拾元：釋會允 釋會保 釋謙定

魏國雄（亡者） 呂正宮（亡者） 呂春長（亡者）

貳仟元：釋振慧 釋旭慧 釋憬慧 林佳慧 鐘崇輔

鐘聖武 吳洪秋梅

壹仟伍佰元：陳戴幼妹 陳秋柑

壹仟壹佰陸拾元：釋廣銘 釋大慧 王玉礫 王素霞

壹仟元：釋會廣 釋親定 鐘紹維 林敬堯 宋品

張惠卿 方志鵬 方信凱 方家敏

伍佰捌拾元：張石圍 邱蘭 張吉華 張宏志 邱全福

邱全晟 吳進雄 簡美銖 吳宛庭 吳宗諺

吳怡靜 吳慧玟

肆佰陸拾伍元：王麗淑 沈敏

爲求流通量增加及內文清晰，遵照^上菩_下妙老和尚指示，原計劃製作古穿線版壹仟冊，工本費貳拾參萬貳仟元，更改爲目前印製之十六開精裝本貳仟冊，工本費共壹拾玖萬陸仟元。餘額參萬陸仟元，撥充華藏淨宗學會法寶製作基金，爲大眾培植福德。

免費結緣·歡迎翻印·功德無量

本寺一切法寶，免費結緣，絕無託人義賣募款，敬請明察。

The book is for distribution. It is not to be sold. Printed in Taiwan.

普為出資及讀誦受持 輾轉流通者迴向偈曰
願以此功德 莊嚴佛淨土 上報四重恩 下濟三途苦
若有見聞者 悉發菩提心 盡此一報身 同生極樂國

公元二〇〇五年十一月 敬印貳仟冊

淨土證心集

倡印者：菩妙老和尚

印贈者：谷青岩元亨寺

地址：嘉義縣阿里山鄉樂野村231號

電話：(05)2561486·2561875

傳真：(05)2561351

打鼓岩元亨寺

地址：高雄市鼓山區元亨街7號

電話：(07)5213236-9

傳真：(07)5512164

出版者：華藏淨宗學會

承印者：世樺國際股份有限公司

